

IKATULO NAHONG PANGUTANA PASTOR ED. ANG BIBLE IYA KONO NA SA KATOLIKO? UG NANGOPYA RA DAW ANG MGA LAIN UG RELIHIYON, KAY WALA PA DAW MATUKOD ANG LAING RELIHIYON WALA PA DAW SILAY BIBLE. TINUOD BA NGA NANGOPYA RA?

Atong hinumduman nga ang Biblia nagpasabot kini sa mga pulong sa Dios nga nasulat. Gisulat kini sa mga tawo nga gilamdagan sa Espiritu sa Dios. Mao nga gitawag kinig, ang pulong sa Dios kay iya kini sa Dios. Ang tag-iya niana mao ang Dios. Kay kon iya pa kana sa mga Katoliko tawgon unta kinig 'Ang mga pulong sa mga Katoliko o kaha tawgon nga 'Ang mga pulong nga alang sa mga Katoliko'. Apan ang Biblia gitawag kinig ang mga pulong sa Dios kay iya kini sa Dios. Makauulaw kaayo kon angkonon nimo ang usa ka basahon nga imoha nga unta bisan usa nalang ka pulong walay imo. Di ba? Busa, makauulaw kaayo kon ang usa ka grupo miingon nga ilaha ang Biblia nga unta wala may usa ka pulong nga nasulat sa maong libro nga ilaha. Wala man gani angkana sa mga magsusulat sa Biblia nga ilaha ang maong sulat nga unta usa sila nga gigamit sa Dios sa pagsulat sa iyang mga pulong. Sama pananglit kang apostol Pedro, wala siya moingon ang ilaha ang maong mga sinulat kondili miangkon sila nga mga instrumento lang sila nga gigamit sa Dios pinaagi sa paglamdag kanila sa Espiritu sa Dios.

2 Pedro 1:20-21(MBB) "Apan labaw sa tanan, hinumdumi kini: walay bisan kinsa nga makasaysay sa kahulogan sa mga propesiya sa Kasulatan pinaagi sa iyang kaugalingong panabot. (21) Kay walay propesiya nga nahimo gumikan sa pagbuot sa tawo. Ang Espiritu Santo maoy nagmando sa ilang pagsulti sa mensahe nga gikan sa Dios."

2 Pedro 1:20-21(AB) "Kinahanglan inyong mahibaloan kini, una sa tanan, nga walay profesiya diha sa Kasulatan nga arang kahimoan sa kinaugalingon nga pagpanabot, (21) tungod kay wala may profesiya nga miabut pinaagi sa kabubut-on sa tawo, hinonoo minandoan sa Espiritu Santo nanagpanulti ang mga balaang tawo sa Dios."

Ang pulong **propesiya** nagpasabot '**mensahe sa Dios**'. Busa ang pag-ingon '**walay propesiya nga nahimo gumikan sa pagbuot sa tawo**'. Kini nagpasabot nga walay mensahe sa Dios diha sa Kasulatan nga nahimo gumikan sa pagbuot sa tawo. nagpasabot dili tawo ang tag-iya niini, walay nga manag-iya niini. Walay grupo nga moangkon nga ilaha kini tungod miabot kini dili tungod sa tawo o sa usa ka grupo kondili ang Espiritu Santo maoy nagmando kanila. Miabot kining pulong sa Dios nga mao kining Biblia karon tungod kay ang mga magsusulat niini gilamdagan sa Dios. Ang Dios maoy tinubdan niini. Siya ang tag-iya niini. Mao nga miingon ang kataposang bahin sa bersikulo 21 '**Ang Espiritu Santo maoy nagmando sa ilang pagsulti sa mensahe nga gikan sa Dios**'. Sama ni David. Nahimo ni David ang pagsulat sa maong mga matahom nga mga Salmo tungod kay gimandoan siya sa espiritu sa Ginoo.

2 Samuel 23:1-2 "Si David nga anak ni Jesse mao ang tawo nga gihimo sa Dios nga bantogan ug gipili nga hari sa Dios ni Jacob ug maoy tighimo sa mga matahom nga awit sa Israel. Mao kini ang kataposang mga pulong ni David: (2) Nakigsulti kanako ang espiritu sa Ginoo pinaagi kanako, ania sa akong baba ang mga pulong niya." Kini nagpasabot nga dili makahimo si David sa maong mga matahom nga mga Salmo kon wala pa maggiya kaniya ang espiritu sa Dios. Nagpasabot nga miangkon si David nga dili gikan niya kining mga Salmoha miabot kini kay gilamdagan siya sa espiritu sa Ginoo.

1 Pedro 1:10-12 "Ang mga propeta nagsusi ug nagpakisayod mahitungod niining maong kaluwasan ug nanagna sila mahitungod niining gasa nga ihatag sa Dios kaninyo. (11) Nagpakisusi sila kon kanus-a ug sa unsang paagi moabot kini. Kining panahona maoy gitudlo sa Espiritu ni Cristo nga diha kanila... (12) Gipadayag sa Dios sa maong mga propeta nga ang gihisgotan nila dili alang sa ilang kaugalingong kaayohan kondili alang kaninyo. Kining mga butanga nadungog ninyo gikan sa mga magwawali sa Maayong Balita pinaagi sa gahom sa Espiritu Santo nga gipadala gikan sa langit..."

Ang Biblia May Tubag

Kini nagpasabot nga ang mga mensahe sa Dios nga anaa sa Kasulatan natagik o nasulat o namugna pinaagi sa giya sa Espiritu Santo nga diha sa mga magsusulat. Busa, dili kini ilaha, mga instrumento lang sila. Wala magpasabot kay sila ang gigamit sa Dios nga ilaha na ang maong mga sinulat. Busa makaulaw kaayo kon naay moingon ang ilaha ang Biblia. Ang paghimo sa ingon nagpakita na nga misupak sila sa giingon sa Biblia.

Hebreo 1:1-2(MBB) "Sa karaang panahon misulti ang Dios ngadto sa atong mga katigulangan pinaagi sa mga propeta sa makadaghan ug sa nagkalainlaing mga paagi, (2) apan niining kataposang mga adlaw misulti siya kanato pinaagi sa iyang Anak. Pinaagi kaniya gibuhat sa Dios ang uniberso, ug gipili siya aron manag-iy sa tanang butang." Ang bersikulo 1 nag-ingon **"Sa karaang panahon misulti ang Dios ngadto sa atong mga katigulangan pinaagi sa mga propeta sa makadaghan ug sa nagkalainlaing mga paagi."** Kini nagpasabot nga sa karaang panahon ang Dios nakigsulti sa mga tawo pinaagi sa mga propeta ug ang gisulti sa Dios ngadto kanila ilang gisulat ug mao kining mga surat nga atong mabasa karon sa Daang Tugon. Mao bitaw nga si Cristo kanunay nimong mabasa nga mokutlo siyag bahin sa Kasulatan nga gipangsulat sa mga propeta sa Dios sa Daang Tugon. Ug ang bersikulo 2 nag-ingon **"apan niining kataposang mga adlaw misulti siya kanato pinaagi sa iyang Anak."** Kini nagpasabot lamang gayod nga sa Bag-ong Tugon misulti ang Dios pinaagi sa iyang Anak nga si Jesu-Cristo. Ug ang mga pulong nga gipangsulti ni Jesus ug ang gipanghimo ni Jesus nga nakita sa iyang mga tinun-an ilang gipangsulat ug mao na kini karon ang atong mabasa sa Bag-ong Tugon. Nagpasabot, ang mga pulong sa Dios nga anaa sa Biblia karon nga anaa sa Daang Tugon ug sa Bag-ong Tugon miabot kini tungod sa Dios. siya ang tinubdan niining mga sinulat. Ang mga propeta sa Daang Tugon ug ang mga magsusulat sa Daang Tugon mga instrumento lang sa Dios. nagpasabot wala pa ang relihiyong Katoliko diha na kining mga sulata. Ug atong hinumduman nga ang tanang magsusulat sa Biblia dili na sila mga Katoliko, walay usa kanila nga Katoliko, unya nganong ingnon man nimo nga ang Biblia iyaha sa Katoliko? Ang Biblia iya na sa Dios, siya ang tag-iy niana.

Isaias 34:16(AB) "Susiha ninyo gikan sa basahon ni Jehova, ug walay usa niini nga mawala, walay makulangan sa iyang kauban; kay ang akong baba, kini nagsugo na ug ang iyang Espiritu, maoy nagtigum kanila."

Ang pag-ingon **'Susiha ug basaha sa libro sa Ginoo'**, ang **libro sa Ginoo** kini nagpasabot sa **Kasulatan** nga karon atong gitawag **Biblia**. Ang pag-ingon **'Walay usa kanila nga makulang'** nga hubad AB nag-ingon **'Walay usa niini nga mawala.'** Kini nagpasabot nga **'Ang tanan nga gisulti niini matuod gayod.'** Ug **walay kulang**. Mao nga kini nagpasabot nga ang tanan nimong gikinahanglan mahitungod unsaon sa pagkinabuhi nga maoy gusto sa Dios naay tubag ang pulong sa Dios. Sa tanan nimong problema, mga kalibog, mga pangutana naay tubag ang pulong sa Dios nga mabasa sa nimo Biblia. Mao nga importante kaayo nga masayod gayod kita sa mga pulong sa Dios nga anaa sa Biblia. Ang kataposang bahin sa bersikulo nag-ingon **"ug ang iyang Espiritu maoy nagtigum kanila."** Kini nagpasabot nga natigom kining mga pulong sa Dios nga mao kining gitawag nato karon ug Biblia tungod kay ang Espiritu sa Dios maoy nagtigom kanila. Bisan daghan kaayo kining mga basahona, bisan kini nasulat sa nagkalainlaing panahon ug nagkalainlaing dapit, bisan kini gisulat sa daghan nga mga magsusulat apan nagkatukman ang ilang mga sinulat ug nausa pa gayod diha sa usa lamang libro nga mao karon nga atong gitawag nga Biblia. Kahibulong kaayo kining butanga. Ug usa kini ka ebedensya nga ang Biblia pulong gayod sa Dios. Natigom kini pinaagi sa Espiritu Santo. Gigamit lang sa Dios ang mga tawo nga aron masulat kini ug ma-comfile kini. Busa, ang Biblia dili kini iya sa Katoliko, iya kini sa Dios. Sama ra gud na niini. Dunay nagdung-ag ug kan-on humag dung-ag iyang gipahaon o gipasukad. Dili nagpasabot nga ang misukad sa kan-on maoy nay tag-iy sa kan-on. Dili gayod. Mao usab niini ang Biblia. Pwede nato maingon nga ang Katoliko maoy nagcompile niini apan wala magpasabot nga ilaha na kini. Ang Dios maoy tag-iy niini. Wala kini panag-iyaha sa usa ka grupo. Busa, kon dunay moingon nga ilaha ang Biblia ug nangopya ra ang ubang relihiyon nasayop siya niana kon ibasi sa Biblia.

Ang Biblia May Tubag

1 Corinto 4:6(MBB) “Kay tungod kaninyo, mga igsoon, gihimo ko si Apolo ug ang akong kaugalingon nga panig-ingnan alang sa inyong kaayohan aron makakat-on kamo sa pagkinabuhi sumala sa Kasulatan...” Ang kataposang bahin sa bersikulo nag-ingon “aron makakat-on kamo sa pagkinabuhi sumala sa Kasulatan...” Kini nagpasabot nga kinahanglan nga ang atong pagkinabuhi nakabasi gayod sa Kasulatan, kinahanglan nga ang atong mga pagtulun-an kinahanglan mabasa gayod sa Biblia. Wala moingon ni apostol Pablo “aron makakat-on kamo sa pagkinabuhi sumala sa Kasulatan nga iyaha sa Katoliko.” Kay basta gani maghisgut ang ug Kasulatan nagpasabot gayod kana sa mga pulong sa Dios nga nasulat nga anaa sa Biblia. Mao nga gitawag kinig Kasulatan. Usa covenant sa Dios ngadto sa iyang mga katawhan.

Roma 15:4(MBB) “Kay ang tanang nahisulat sa Kasulatan gisulat aron pagtudlo kanato ug sa ingon makabaton kitag paglaom pinaagi sa pailob ug sa kadasig nga gihatag kanato sa Kasulatan.” Ang unang bahin sa bersikulo nag-ingon “Kay ang tanang nahisulat sa Kasulatan.” Wala moingon si apostol Pablo nga among Kasulatan. Kini nagpasabot nga ang tanan nga nahisulat sa Kasulatan gisulat aron pagtudlo kanato aron makabaton kitag paglaom ug kadasig nga gikan gayod sa Kasulatan. Nagpasabot kinahanglan nga ang imong gilaoman ug gituohan nga mga butang kinahanglan gikan gayod sa Biblia. Dili kay ibasi lang nato unsay naandan o unsay namat-an kay daghan tag namat-an nga sukwahi kaayo sa gitudlo sa Biblia.

Salmo 102:18(MBB) “Isulat alang sa umaabot nga kaliwatan ang gibuhat sa Ginoo, aron magdayeg kaniya kadtong wala pa mangatawo.” Kini nagpasabot nga kining mga Balaang Kasulatan nga gipangsulat sa mga propeta sa Dios nga mabasa nato sa Biblia, gisulat kini aron kita nga wala pa matawo sa maong panahon masayod unsay gibuhat sa Dios ug unsay iyang gusto nga atong buhaton. Mao kini ang katuyoan nganong gipasulat gayod sa Dios ang iyang gipanulti ug gipangbuhat sa daang panahon. Kini nagpasabot lamang nga wala pa ang Katolikong Simbahan nasulat na ang mga pulong sa Dios diha sa mga Kasulatan. Wala pa lang kini ma-compile ngadto sa usa na lamang o wala palang kini mausa tanan o macompile.

2 Timoteo 3:16(MBB) "Ang tibuok Kasulatan gisulat uban sa lamdag sa Dios ug mapuslanon alang sa pagtudlo sa kamatuoran, sa pagbadlong, sa pagsaway ug sa pagtudlo unsaon pagkinabuhi nga matarong."

Ang unang bahin sa bersikulo nag-ingon 'Ang tibuok Kasulatan gisulat uban sa lamdag gikan sa Dios.' Ang pag-ingon nga “tibuok Kasulatan” nagpasabot tibuok bahin sa Biblia nilamdagan sa Dios. Nasulat kini tungod sa giya ug sa lamdag sa Dios. Ang Dios maoy naglamdag o naggiya sa mga magsusulat sa Kasulatan unsay isulat nga mga pulong o mga mensahe pinaagi sa iyang Espiritu Santo nga diha kanila. Gigamit lang sa Dios ang mga tawo nga aron masulat kini ug ma-comfile. Apan ang Dios maoy tag-iya niini. Busa, ang Biblia dili kini iya sa Katoliko, iya kini sa Dios. Sama ra gud na nga dunay naglung-ag ug kan-on, human niyang lung-ag iyang gipasukad. Dili nagpasabot nga ang misukad sa kan-on mao nay tag-iya sa kan-on. Mao usab niini ang Biblia. Pwede nato ingnon nga ang Katoliko maoy nagcompile niini apan wala kini magpasabot nga ilaha na kini. Iya kini sa Dios. Ang Dios maoy tag-iya niini. Wala kini panag-iyaha sa usa ka grupo. Busa, kon dunay moingon nga ilaha ang Biblia ug nangopya ra ang ubang relihiyon nagpasabot kini nga nakigcontra siya sa Dios. Kay giangkong man niya ang dili iyaha. Dilikado niana sa Dios. Busa, ayaw pangangkong kon dili imo.

PASTOR ED TINUOD BA NGA SEPTEMBER 8 ANG BIRTHDAY NI MARIA? UG MABASA BA SA BIBLE NGA SEPTEMBER 8 NATAWO SI MARIA? UNSA JUD DIAY KA IMPORTANTE SI MARIA NGA SA MGA PAG-AMPO SI MARIA MAN MAOY SAMPITON. UG TINUOD BA NGA OK RA NGA MAGPATABANG TA NI MARIA UG SA MGA SANTOS SA ATONG MGA PAG-AMPO KAY MAGPATABANG MAN GANI TA SA MGA PASTOR O SA MGA PARI, SILA PA KA HA SI MARIA UG MGA SANTOS NGA DUOL NA SA DIOS? TINUOD BA NA?

Sa Biblia wala gayod kay mabasa nga naay gibutang nga birthday ni Maria. Wala kini ibutang diha sa Biblia tungod kay dili na kini importante alang sa kaluwasan sa mga tawo. Mao nga sa Biblia dili gayod ka makabasa nga naay gibutang nga birthday ni Maria. Apan ang dakong pangutana mao kini: **ngano man nga sa Katolikong Simbahan naa man silay gisaulog nga bulan ug petsa nga natawhan o birthday kono ni Maria nga mao ang September 8 nga unta dili man kini mabasa sa Biblia? Dis-a man nila kini kuhaa nga unta wala man mahisgut ang Biblia mahitungod sa adlawng natawhan ni Maria?**

Aron masabtan gayod nimo pag-ayo nganong gisaulog sa Katolikong Simbahan ang September 8 isip mao konoy petsa sa pagkatawo ni Maria o birthday kono ni Maria, kinahanglan masayod kita pag-una mahitungod sa pagtulun-an nga si **“Maria gipanamkon nga walay sala”** nga iningles pa **“Immaculate Conception of Mary.”** Kinahanglan masayod kita kon kanus-a kini magsugod nga doktrina. Dinhi nimo mahibaloan nganong gisaulog nila ang birthday ni Maria nga September 8. Mao nga kinahanglan ako sang ipasabot pag-una kaninyo ang doktrina mahitungod sa **“Immaculate Conception of Mary”** kay mao kini ang hinungdan ngano nga September 8 ang gisaulog sa Romano Katolikong Simbahan nga maoy birthday kono ni Maria.

Ang doktrina mahitungod sa **“Immaculate Conception of Mary”** nagtudlo **“that Mary was conceived without sin** (that is, she had no original sin), **and that she never sinned throughout her life”**. Mao kini ang pagtulun-an mahitungod sa doktrina nga gitudlo sa Romano Katolikong Simbahan nga **“Immaculate Conception of Mary.”** Sa Biblia wala gayod kay mabasa bisan usa nalang ka bersikulo nga si Maria gipanamkon nga walay sala. Ang mabasa nimo sa Biblia nga gipanamkon nga walay sala mao lamang ang atong Ginoong Jesus, tungod kay si Jesus lamang ang natawo nga gipanamkon nga lalang sa Espiritu Santo.

Lucas 1:46-47 "Unya miingon si Maria, 'Nagdayeg ang akong kasingkasing sa Ginoo, Ug nagmalipayon ang akong kalag tungod sa Dios nga akong Manluluwas."

Kini klaro kaayo nga nagpasabot kanato nga si Maria miangkon nga siya adunay manluluwas nga mao ang Dios. Kini nagpasabot nga si Maria mismo nagkinahanglan diay ug manluluwas. Kon wala pa siyay sala nganong nagkinahanglan man si Maria ug manluluwas? Busa, dayag nalang kaayo nga si Maria sama ra usab kanato nga nagkinahanglan ug kaluwasan. Busa sama ra usab siya kanato nga makasasala nga nagkinahanglan ug kaluwasan. Mao bitaw nga sa Biblia wala gayod kay mabasa bisan usa nalang ka bersikulo nga si Maria gipanamkon nga walay sala.

Sumala sa libro nga giulohan **“Truth Encounter”** p.139 nagkanayon, **“Another dogma of the Catholic Church, one that glorifies Mary the most, is the dogma of the Immaculate Conception defined by Pope Pius IX on Dec.8, 1854.”**

Kini nagpasabot nga ang pagtulun-an nga si Maria gipanamkon nga walay sala (**Immaculate Conception of Mary**) nagsugod niadtong December 8, 1854 sa dihang giproklamar kini ni Pope Pius IX ang maong pagtulun-an. Mao nga dili ka matingala nga December 8 ang fiesta sa **Immaculate Conception** kay mao kining petsaha nga namugna ang maong pagtulun-an pinaagi ni Pope Pius IX. Busa, dayag nalang kaayo nga dili gayod kini gikan nga pagtulun-an sa Biblia kondili mitungha lang kini kay giproklamar kini ni Pope Pius IX niadtong December 8, 1854. Ug pinaagi niini anhi ka masayod nganong gibutang gayod sa Katolikong Simbahan nga September 8 kono ang birthday ni Maria tungod kay kon kwentahon nimo ang petsa sa pagkamugna sa doktrina nga **Immaculate Conception of Mary** ang iyang ikasiyam nga bulan mao ang September 8. Kay ang normal nga ting-anak sa usa ka babaye siyam man ka bulan. Mao nga gibutang nila nga ang birthday ni Maria September 8 kono. Kwentaha sugod sa December 8 nga maoy bulan ug petsa nga namugna ang doktrina nga **Immaculate Conception of Mary** di ba kay ang ikasiyam nga bulan mao ang September 8. Kini nagpasabot nga ang September 8 nga maoy gitudlo sa Katolikong Simbahan nga maoy birthday kono ni Maria gibasi lamang diay kini kon kanus-a namugna ang doktrina nga **Immaculate Conception of Mary**. Busa dayag nalang kaayo nga ang maong petsa nga September 8 nga gitudlo sa Katolikong Simbahan nga mao kono ang birthday ni Maria dili gayod na gikan sa Biblia kondili gibasi lamang ka na kon kanus-a namugna ang doktrina nga **Immaculate Conception of Mary**. Kay namugna man kini sa petsa nga December 8, busa ilang gitudlo nga September 8 ang natawhan ni Maria kay mao man kini ang ikasiyam nga bulan gikan sa December 8. Busa, dayag nalang kaayo nga dili gayod kini tinuod. Mao bitaw nga sa Biblia wala gayod kay mabasa sa adlawng natawhan ni Maria. Wala kini ibutang diha sa Biblia tungod kay dili na kini importante alang sa kaluwasan sa mga tawo.

Ang ikaduhang bahin sa imong pangutana nag-ingon: **UG TINUOD BA NGA OK RA NGA MAGPATABANG TA NI MARIA UG SA MGA SANTOS SA ATONG MGA PAG-AMPO KAY MAGPATABANG MAN GANI TA SA MGA PASTOR O SA MGA PARI, SILA PA KA HA SI MARIA UG MGA SANTOS NGA DUOL NA SA DIOS? TINUOD BA NA?**

(a) Sa Biblia wala gayod kay mabasa nga nagtudlo ang Dios nga makatabang pa ang mga patay. Wala gayod magtudlo ang Dios nga pwede kang magpatabang sa mga minatay. Ang mabasa nimo sa Biblia, gidili sa Dios nga makig-estorya kag minatay. Gidili nga mag-ampo ka ngadto sa usa ka minatay. Mao nga ang tawo nga makig-estorya sa minatay gitawag na sa Biblia nga espiritista. Mao nga mabasa nimo sa Biblia nga ang pagpakig-estorya sa mga minatay usa ka praktis nga pagano.

Deuteronomio 18:9-12, 14(AB) “Sa makaabut ka na sa yuta nga gihatag kanimo ni Jehova nga imong Dios, dili ka magtoon sa pagbuhat ingon sa mga kangil-ad niadtong mga nasud. (10)Dili hikaplagn uban kanimo ang bisan kinsa nga magpaagi sa iyang anak nga lalake kun anak nga babaye sa kalayo, usa nga nagagamit sa pagtagna, usa nga nagapanghimalad, kun anting-antingan, kun diwatahan; (11)kun magwiwili, kun magpakitambag sa mga kailang espiritu, kun mag-iila nga malalangon, kun magpapangutana sa mga minatay. (12)Kay dulumtanan alang kang Jehova...” Sa bersikulo 11 nag-ingon “**magpapangutana sa mga minatay**”. Kini nagpasabot nga ang praktis nga makig-estorya kag minatay, sama sa pagpangadgi sa mga minatay, usa diay na ka espiritismo nga buhat kon Biblia ang atong basihan. Ang magbuhat niana gitawag sa Biblia nga espiritista. Dili gusto ang Dios nga ang katawhan sa Israel moawat niini nga buhat kay usa kini ka buhat nga wala kahimut-i sa Dios. Wala gayod siya magtudlo nga mangadgian ka o magpatabang ka sa mga minatay.

Atong hinumduman nga kon ang tawo patay na ang iyang kalag anaa sa kamot sa Dios.

Job 12:10(AB) “Sa iyang kamot anaa ang kalag sa tanang butang nga may kinabuhi, ug ang gininhawa sa tanang katawohan?”

Ecclesiastes 12:7(MBB) “Unya mopauli sa abog ang atong lawas, ug ang atong espiritu mopauli sa Dios nga maoy naghatag niini kanato.”

Kini nagpasabot nga ang kalag sa mga minatay dili na makasuroysuroy kay anaa sila sa kamot sa Dios, nagpasabot nga anaa na sa pag-atiman sa Dios. Ug dili gayod mosugot ang Dios nga magsuroysuroy pa sa kalibotan. Mao nga dili na sila makaapil sa mga kalihokan sa kalibotan o kalihokan sa mga buhi.

Ecclesiastes 9:5-6(MBB) “Ang mga buhi nasayod nga mangamatay sila, apan ang mga patay wala nay mahibaloan bisan unsa. Wala na silay mapaabot nga ganti; hikalimtan na sila sa hingpit. (6)Natapos uban kanila ang ilang mga gugma, mga kasilag, ug mga kaibog. Dili na sila makaapil sa kalihokan niining kalibotan.”

Ang bersikulo 6 nag-ingon “**Natapos uban kanila ang ilang mga gugma, mga kasilag, ug mga kaibog. Dili na sila makaapil sa kalihokan niining kalibotan.**” Kini nagpasabot nga bisan unsa pay imong buhaton para kanila o para sa mga minatay wala na nay kwenta kay dili na sila makaapil sa mga kalihokan dinhi sa kalibotan ug dili na sila makatabang sa mga buhi.

(b) Ang kaluwasan individual o iyahay – usa-usa kitang makighusay sa Dios.

Gipadayag 20:12(ABMBB) “Ug nakita ko ang mga patay, inila ug dili inila, nga nagbarog atubangan sa trono. Gibukhad ang mga libro ug may lain pa gayong librong gibukhad nga mao ang libro sa kinabuhi. Gihukman ang mga patay sumala sa ilang binuhatan nga nasulat sa mga libro”

Ang kataposang bahin sa bersikulo nag-ingon “**Gihukman ang mga patay sumala sa ilang binuhatan nga nasulat sa mga libro.**” Kini nagsulti kanato nga hukman sa Dios ang mga patay sumala sa ilang gipangbuhat sa buhi pa sila. Dili kay hukman sila sumala sa gibuhay sa ubang tawo para nila. Nagpasabot, tanan natong gipangbuhat sa buhi pa kita, nakasulat

Ang Biblia May Tubag

diay kini sa mga libro didto sa langit. Busa, kon namatay ka nga palahubog, bisyoso, sugarol, talamagi, hukman ka sa Dios sumala niana. Dili ka hukman sumala sa gibuhat

5

sa ubang tawo para nimo. Dili ka hukman kon gipangadgian ka ba o wala. Kondili hukman sa Dios sumala sa imong gipangbuhat sa ka pa. Nagpasabot ang kauwasan usa-usa o individual. Kinahanglan nga ikaw gayod mismo ang motoo kang Jesus nga maoy gayod ang imong Ginoo ug Manluluwas sa imong kinabuhi.

Juan 1:12 “Hinupon, may midawat ug mitoo kaniya; busa sila gihatagan niya sa katungod nga mahimong mga anak sa Dios.” Ang ‘kaniya’ nagpasabot kang Jesus. Kini nagpasabot nga kinahanglan kitang makigrelasyon kang Jesus personally. Si Jesus ang atong gikinahanglan aron makabaton kitag saktong relasyon sa Dios. Kinahanglan nga motoo ka ug modawat kaniya nga maoy imong Ginoo ug Manluluwas sa imong kinabuhi. Kon gibati nimo nga daw layo ikaw sa Dios, sulayg duol kang Jesus makigrelasyon ka kaniya. Ingna siya ‘Ginoong Jesus, giangkong nako nga ako usa ka makasasala. Dili ko makaluwas sa akong kaugalingon. Ginoong Jesus, mitoo ko nga ang imong katamayan sa krus maoy lukat sa akong kasal-anan. Dawaton ko ikaw nga akong Ginoo ug Manluluwas sa akong kinabuhi. Hatagi ko sa imong Espiritu aron mabuhay nako ang mga butang nga maoy imong gikahimut-an.’ Sulayi kining matanga sa pag-ampo ug himoa kini sa kinasingkasing.

Ezequiel 14:20(ABMBB) “Bisan pag nagpuyo uban kanila si Noe, si Daniel ug si Job, tungod kay ako buhi man nga Dios, kining tulo ka tawo dili makaluwas sa ilang mga anak. mao ray makaluwas ang ilang kaugalingon tungod sa ilang pagkamatarong. Ang Ginoong Dios maoy nagsulti niini.”

Kini nagpasabot nga ang mga ginikanan dili makaluwas sa ilang mga anak ni ang anak makaluwas sa iyang ginikanan, kay ang kaluwasan iyahay o individual.

Roma 2:6 (ABMBB) “Kay hukman sa Dios ang matag tawo sumala sa iyang mga buhat.”

Roma 14:12(ABMBB) “Busa ang tagsatagsa kanato maghatag ug husay sa iyang kaugalingon ngadto sa Dios.” Busa kini klaro kaayo nga ang Biblia nagtudlo gayod nga hukman sa Dios ang matag-tawo sumala sa iyang mga buhat. Busa, ang gibuhay sa ubang tawo para sa minatay, sama sa pagpangadgi wala na nay kwenta, wala na nay kapuslanan kon Biblia ang atong basihan. Kay kon tinuod pa na, luoy kaayo kitang mga pobre kay wala kitay ika-apord sa mga misa ilabina sa mga mahal nga misa. Apan salamat sa Dios kay dili ingon niana ang paagi sa Dios sa paghukom sa tawo, kondili iyahay o individual. Usa-usa kitang manubag sa Dios sa atong gipabgbuhay sa buhi pa kita. Kon tinuod ba gayod kita nga mitoo kang Jesus nga maoy atong Manluluwas. Kon tinuod ba gayod nga kita nagkibuhay sa iyang kabubut-on.

(c) Ang mga alagad sa Dios nga buhi makatabang sila makanimo pagtudlo sa paagi unsaon nga maluwas apan dili sila makatabang kanimo sa imong kaluwasan.

Buhat 16:30-32(MBB) “Unya sila gipagawas niya ug gipangutana, ‘Sir, unsa may akong buhaton aron ako maluwas? (31)Sila mitubag, ‘Tuo sa Ginoong Jesus, ug maluwas ka lakip ang imong panimalay. (32)Unya siya ug ang tanang sakop sa iyang panimalay giwalihan nila sa pulong sa Dios.” Kini klaro nga nagsulti kanato nga sa dihang gipangutana siya sa usa ka tawo unsay buhaton aron maluwas miingon siya ‘**Tuo ni Ginoo Jesus ug maluwas ka**’. Wala mingon si apostol Pablo ‘ayaw lag kabalaka kay ako ray bahala nimo, ako ray hangyo sa Ginoo alang sa imong kaluwasan. Wala siya moingon niana. Kondili miingon siya ‘tuo ni Ginoong Jesus aron ka maluwas. Nagpasabot, makig relasyon ka ni Jesus, too kaniya nga maoy imong Ginoo ug Manluluwas sa imong kinabuhi. Paharian siya sa imong kinabuhi. Ang pag-ingon nga ‘**Tuo sa Ginoong Jesus, ug maluwas ka lakip ang imong panimalay.**’ Wala kini magpasabot nga maapil nag kaluwas ang asawa ug mga anak tungod kay mitoo na ang amahan. Dili. Kay pag-abot sa bersikulo 32 giwalihan ni Pablo ang iyang sakop sa panimalay iyang gipasabot usab sila nga kinahanglan silang motoo kang Jesus. Mao kini ang giingon sa bersikulo 32 “**Unya siya ug ang tanang sakop sa iyang panimalay giwalihan nila sa pulong sa Dios.**” kay kon atomataic pa, dili na walihan ni Pablo ang sakop sa iyang panimalay. Kini nagpasabot lamang gayod kanato nga ang mga minatay bisan nga mga santos pa na sila o bisan mga alagad pa na sa Dios basta patay na dili nana makatabang kanato busa dili ka angay nga mag-ampo ngadto

Ang Biblia May Tubag

kanila. Ug ang mga buhi usab nga mga alagad sa Dios dili sad na sila makatabang sa imong kaluwasan kay ang kaluwasan iyahay apan pwede makapasabot unsay paagi sa kaluwasan.

JSCGF